

小倉山房詩集

小倉山房詩集卷三十一

乙巳丙午

錢唐袁枚子才

乙巳元旦舟中與霞裳聯句

舟中度元日江上領春風宿雨猶霑樹袁朝陽乍出宮

喜無賀歲事劉轉有賦詩功家近心尤急袁天遙霧正

濛閒窓迎紫氣劉解纜促篙工寸步行皆喜袁千山看

未終醉人眠舵側劉爆竹響波中吉語時聞耳袁祥飈

替轉篷遠村梅盡白劉隣舫鬢花紅伐鼓兒童競袁敲

棋師弟同紀年更甲乙劉認水辨西東想見深閨裏金

錢卜幾通袁

新正十一日還山

自覺山人膽足夸行年七十走天涯公然一萬三千里  
聽水聽風笑到家

迎門兒女慶團圓隣里爭當遠客看不是桃源真福地  
如何雞犬盡平安

香雪階前撲面飛喜從香裏解征衣老妻指向諸姬笑  
不爲梅花尚不歸

一雙孔雀艷歸裝惹得傾城士女狂爲要誘他開翠尾  
麗人來往盡濃粧

賓客連宵坐滿庭問山問海問花名急抄詩與諸公讀  
省得衰翁說不清

重埋殘書喜不支一言擬告世人知莫嫌海角天涯遠

但肯搖鞭有到時

七十生日作

士龍百年歌七十始長嘆可知上壽難古人見謂翰我  
今危得之自取平生按解龜四十年著述百餘卷多少  
顯榮人隨風作雲散而我獨迢然青蓮留一瓣愛惜一  
山雲不肯三公換悟徹萬緣空不屑空門窟食不喜重  
味而恰精肴饌氣不識金銀而亦多清玩心安身卽行  
陰陽非所憚埋足口卽言往往翻前案樂自尋孔顏學  
不拘宋漢新從兩粵歸萬里江山看攬揆三月天滿園  
春色爛偕老妻尚存選生兒亦丕奚僮蒼頭多諸姬白  
髮半開池成巨波種松成古幹弟子來英英老夫時灌

灌夷甫尚鮮明韓嬰頗精悍雖乏李清繩遽把仙凡判  
且學魯季孫六轡東門辦住隨白日留去憑天公喚詩  
成鳥共吟酒到花能勸忘老當作孩視昏猶若且厭聽  
麥邱祝自作東方贊

不染鬚

留鬚鑷鬚染鬚都有詩四十年來能幾時今年七十柴  
不必一白而已鬚事畢記得當初未有渠意氣凌雲渺  
八區一回吟咏一回老不憚韶光只惱鬚我既不能諱  
老求官祿又復不能煖老求燕玉有如婦婦此心灰永  
不粧臺理膏沐人言本色是英雄我恰掀髯笑未終二  
十一科黃榜客捫心可是白頭翁莫嫌老去人無用有

時老亦因人重且免身充元甲軍兼堪彈出銀絲供君  
不見蒲輪車上尊酒不向終童家裏走又不見香山圖  
畫洛社耆英都是皤皤黃髮形我鬚容易白如許頭責  
何須勞子羽聞聰只替海棠愁一樹梨花將壓汝

考據之學莫盛于宋以後而近今爲尤余厭之戲

仿太白嘲魯儒一首

東逢一儒談考據西逢一儒談考據不圖此學始東京  
一邱之貉于今聚堯典二字說萬言近君迷入公超霧  
八寸策訛八十宗遵明揭揭強分疏或爭關雎何人作  
或指明堂建某處考一日月必反唇辨一郡名輒色怒  
干卿底事漫紛紜不死飢寒死章句專數郢書燕說對

喜從牛角蝸宮赴我亦偶然願學焉頃刻揮毫斷生趣  
搏拊故紙始成篇彈弄雲和輒膠柱方知文字本天機  
若要出新先吐故魯人無聊把藩拾齊士談仙將影捕  
作爾雅非磊落人疏周官走蠶叢路當時孔聖尙闕疑  
孟說井田亦臆度底事于今考据人高睨大談若目覩  
古人已死不再生但有來朝無往暮彼此相瞰昏夜中  
畢竟輪贏誰覺悟次山文碎皇甫譏夏建學瑱乃叔惡  
男兒堂堂六尺軀大筆如椽天所付鯨吞鰲擲杜甫詩  
高文典冊相如賦豈肯身披賦類拾甘遂康成車後步  
陳迹何妨大略觀雄詞必須自己鑄待至大業傳千秋  
自有騁儒替我註或者收藏典籍多亥豕魯魚未免誤

招此輩來與一餐鎖向書倉管書蠹

戲夢樓

夢樓見佛不見我一望蒲團頭欲墮鄙人見我不見佛  
行過香臺不作揖君不必爭佛有我不必爭佛無只問  
此中方寸意何如請看世上尊官貴人亦儘有我果無  
所求則亦視有如無免應酬

遣懷雜詩

一笑老如此作何消遣之思量無別法惟有多吟詩譬  
如將眠蠶尚有未盡絲何不快傾吐一使千秋知  
早貴如早起所見人事多早退如早眠心神常安和吾  
生有天幸熊魚竟兼兩每聞宦海波設想吾其倘



雨脚三月斷火龍當空播偶有一片雲狂風驅還山老人苦炎烝風前將書攤磨墨如車水隨車隨時乾筆燥觸紙響何能生文瀾硯田尙如此農田更可嘆願揮濯身汗當作時雨頒

萬物蟄于冬而我蟄于夏赤帝一當關羣客可以謝我其陳螭歟蒙頭不出舍書卷盡情翻衣冠終日卸平生所著述往往迓此暇可奈正憑欄秋隨一葉下

女媧搏黃土濛濛沙塵飄百千億萬年回轉無停鑣而我生其間泰山一鴻毛雖則一鴻毛矜矜頗自豪三十早歸田二十早登朝在邦無怨尤在家無喧呶逢花皆采折無山不遊送李杜韓歐蘇相逢足解嘲官或比我

壽都輸我高誰是七十翁握筆猶嚶嚶

斤才欲其大凡志欲其小才大事易辦志小量易飽譬如挽強弓我力十石餘情願挽九石其氣恬以舒君看韓彭輩不如滕與薛更看袁公路不如黑山城阿斗與黃奴以懦全其生李志與曹蜍以庸傳其名

一見動相慕未見早相惡問其所以然有緣無緣故緣法苟未終臨死補一面如其無緣者抵死不相見豈徒今人哉千古亦如此或佞我愛之或賢我不喜緣之所由來其中豈無因知者其天乎板板偏不言

寶融在河西光武欲招之適融遣使來彼此歡不支隗囂亦遣使中途被讐殺遂致生讐端彼此兩不察其一

富貴終及其子若孫其一勤干戈禍至滅其門其時佛  
未來緣法已如此佛因敷衍之曉人當如是

宋儒談性理漢儒談典章或疑尙書僞或道周官亡聚  
訟數千年長夜無燭光我聞沮渠遜言人浮海洋親見  
孔聖人絃歌聲未央七十二弟子羅立自成行何不往  
詢之所苦無舟航傷哉觸觸生捕影枉自忙雖有記事  
珠不如返寬香

有心積陰德殊非高士懷而况讀堊經貪鄙尤可哀古  
有端木叔六十而散財彼豈真老悖不念子孫哉實見  
身後事非我所安排宣尼大神聖晚年伯魚與昭王溺  
于楚成康非禍胎看破此機關浩浩與天偕出門不選

日入廟不持齋陰陽非所忌仙佛難我給隨雲去處去  
隨風來處來

明月幾時有問天天不知縱云有開闢開闢始何時往  
往眼前事考究無窮期與其張目想兀兀發狂癡不若  
合眼眠一笑姑置之

少年愛讀書硜硜守章句衰年愛讀書消遣領其趣雖  
然讀輒忘過眼皆吾有書味在胸中甘于飲陳酒  
漢有符節郎請發不韋慕謂是秦火前所藏多竹素求  
書至發冢早被莊周譏我意覺可惜發或竟得之不見  
陳伯茂曾發祁墓墳大獲右軍書幅幅生烟雲

鋤地得寶者斷非望氣掘世世出公卿不聞謀吉穴彭

鏗壽最長何曾談服食百戰百勝將兵書字不識天之  
所付與不必人營謀何苦蚩蚩氓奔如燒尾牛知進不  
知退力欲爭上流豈無烘開花一開花已休

代公未遇時盜鑄畧人口及其成大功黃龍且授首國  
箸寶懷貞無恥衆所訾及其簿錄日俸外少餘資盧杞  
亂天下家無妾媵妍杲卿大忠烈乃索花粉錢寄語腐  
儒輩觀過寸其黨放開眼界寬流覽史書廣

劉誠允善飲苦無酒伴陪或薦一軍校可以千百杯問  
其量何如曰醉不敢放愈到沉酣時愈作謙謹狀劉乃  
笑搖頭此未足爲量凡事一改常識者所不尙

嘉祐頒陣前德用諫不可道兵貴神速泥古恐相左錢

乙善醫疾往往心忖量道是病萬變不可拘古方觀此  
二公言可悟作文術提筆學化工一味活潑潑

貪生學仙少畏死學佛多生死兩相忘仙佛如余何我  
道佞佛者其人必諂諛未知靈與否尙向木偶趨奚况  
權貴門炙手可熱歟

邢尹一相見涕泣服其美賈充郭夫人見李屈膝矣青  
蓮服崔顥不敢再題詩李邵愧劉蕡登科願讓之真美  
人才子大抵心多虛木虛爲琴瑟竹虛爲笙竽後代妄  
庸人不肯爲人下山醫形如豚厥性但好罵

侂冑魏公孫並非宦寺流伐金雖賈禍志在復國仇偶  
作南園記思擬畫錦堂不喜鄭械作而慕放翁名出其

四夫人玉手擎杯觴下士肯如此便是爲善資毋怪放翁作勤懇加規詞一朝事機失頭顱敵國葬士論羣吠聲放翁名節喪豈知論成敗所見尤卑庸符離大喪師謀者張魏公何以不加誅人異事則同太邱弔張讓不失爲君子一切苛刻論都從宋儒始

青耕能禦疫跂踵好降災窮奇見善去鯁鯁觸邪來物性大不齊人性亦參半所以孔子言上智下愚判子輿道性善學孔翻孔案

漢有崔子玉隨官葬洛陽唐有幸藏之亦葬萬年鄉道死果有知吾豈守墓者如其死無知枯骨何取捨我意亦如此隨園旁起墳雖學龐博達終愧首邱仁

報德必以德聖人有明言宋人獨反之攻擊先恩門魏  
公薦王陶陶劾其縱恣歐薦林之奇林發其陰事允文  
薦蕭杲杲乃首疏彈旁有朱晦翁噴噴加贊嘆嗚呼報  
施絕忠孝何由來且冷朝士心何人肯愛才惟有范文  
正大賢獨多情一受元獻薦終身稱門生

屋造鼠卽至池開魚卽生問其所由來蹤跡不分明大  
抵天地間氣化先形化青寧程馬間生生相代謝洪荒  
無匹偶人類自萌芽伊尹生空桑諸汾無母家

人言晚景佳恰比少時好我意道不然行樂還須早譬  
如美衣裳少艾可光軀老雖著金紫不稱白髭鬚又如  
美飲食壯佼不嫌多及其旣衰矣未饜腹已餍我少雖



好學無力購書看而今眼昏花萬卷徒空攤又嘗思窮  
窶貧莫能致之而今作枯楊生梯亦可嗤所以徐謬言  
人生壽七十生長富貴家一日抵兩日

夢遊淡巖石上鐫此四句

一回開闢一乾坤物換星移日日新盤古如麻朝玉帝  
不知誰是領班人

題鄒若泉牧羊圖

白艸黃沙望眼迷荒荒落日雪山西羣羊似解孤臣意  
翹首南雲一剪齊

李廸丹青筆最超鄒生粉本更親描擬教添个蘇卿婦  
幾點胭脂染節毛

誰家

誰家低唱玉璫玲  
流管清絲夜不停  
一曲歌終人一世  
那堪頭白客中聽

哭陸朗夫中丞

持節長沙有正人  
泊舟野叟謁清塵  
誰知望重蕭夫子  
早識風流賀季真  
傾蓋未消衡嶽雨  
停春已失楚江春  
傷心萬里西征賦  
爲了三生一見因

栽樹自嘲

七十猶栽樹  
旁人莫笑癡  
古來雖有死  
好在不先知

哭蔣心餘太史

西江風急水搖天  
吹去人間老謫仙  
名動九重官七

品詩吟一字響千年空中香雨金棺掩帳下奇兒玉笋  
聯如此才華埋地底夜深寶劍恐騰烟

君家花裏別君時君起看花力不支

三月四日

一慟自知無

見理九原還望有交期應劉並逝空存我李杜齊名更  
數誰教作藏園詩稿序已成未寄倍凄其

### 自驚

蕭蕭落葉滿階庭冉冉流光老自驚世事過來惟有夢  
古人一去總無聲千年仙鶴歸何晚兩個金丸打不清  
悟得輪回文字孽張衡才死蔡邕生

### 哭章公子

傳來消息滿城悲玉樹凋傷第一枝心力豈緣書局盡

姓名已受

聖人知

公于纂修四庫書議敘員外

蘭方欲露花先墮

得正凌霄翅忽垂從古天心忌才子不教終賈髡如絲  
跋扈飛揚氣絕羣偏于野叟最殷勤每吟佳句先呈我  
豈料衰年反哭君賴有舒祺延弱息更無阿鷺嫁秋雲  
而翁倘作西河慟莫遣堂前大母聞

香亭卓薦後欲賦遂初忽以前任霍邱事鐫級聞

其歸舟已過峽江喜而有作

聽說君歸喜欲顛更聽君到峽江邊去官難得因微罪  
行樂公然尙壯年骨肉兩家人健在星霜五載夢纏綿  
開牕屢探春風色月照荊花影又圓

代謀精舍老身忙硯北溪南費酌量陸賈裝雖無巨萬

阿連居要有池塘水邊斑管高吟處竹裏棋枰小戰場  
淮擬安排來告汝白頭一笑共扶將

端江作別泪交流那料重逢歲兩周雲路似君真可惜

風帆依我竟須收

大府出考語甚佳

門前五柳心思種海上三

山浪打舟天意玉成知感否好燒紅燭夜同遊

從此青溪水不寒高風六代有人攀陸機文史東西屋

何點琴尊大小山棠棣花雖兩處種桃源門可一家關

唐生相我言如驗五載猶能作往還

相士胡文炳相余六十三歲得子壽

七十六其一已驗

袁郎詩爲霞裳補作

有序

在粵東時袁郎師晉年十七明慧善歌爲吳明

府司閨中見霞裳推襟送抱苦不得一露  
三謀得私約某日兩情可申忽主人奉大府檄  
火速鑿行郎不得留與霞裳別江上涕如縷縻  
余思兩雄相悅數典殊希爲補一詩作桑間濮  
上之變風云

珠江吹斷少男風珠淚離離墮水紅緣淺變能生頂刻  
情深誰復識雌雄鄂君翠被床才疊荀令香爐座忽空  
我有青詞訴真宰散花折柳太匆匆

### 騎牛

騎馬上林街騎鶴揚州市平生兩願都已償惟有騎牛  
身未試場來鄉間逢水牛相牛之背笑不休此是人間

安穩處七十老翁有所求呼僮扶上不施鞚牛亦相憐  
身不動雨笠烟蓑汝慣馱褰衣大袒母乃重鞭之不前  
行徐徐此牛腹中似有書聽之黃鐘滿脰鳴此牛曾否  
三犧生可見世間萬事學難了騎牛未必牛道好但願  
他生一日作牧童絕勝終朝牽鼻爲三公

穀雨雪

重陽雪穀雨雪兩年下雪非時節菊花秋草尙禁寒海  
棠嬌紅定愁絕老農老圃爭致詞春行冬令非所宜各  
持天官書一册按歷書雲占驗之我道萬事總憑天作  
主無心成化本如許若教板板循規矩天不作天讓與  
汝

女弟子陳淑蘭窻前開紅蘭一枝遣其郎君鄧秀

才來索詩

佳話傳來鄧十郎金閨蘭草作紅妝想因燕姑梳頭處  
偶灑臙脂水數行

十年辛苦國香栽消息曾無一朵開今日徵蘭芳訊到

紫瓊宮裏有人來

鄧未  
有子

名重針神遠近聞同心同臭有夫君好將一穗紅心草  
繡向瀟湘六幅褰

端陽

黃鸞聲裏泛蒲觴今歲春光太覺長七十一人未見  
滿欄芍藥過端陽



檢書圖爲盧抱經學士題

他人借書借而已君來借書我輒喜一書借去十日歸  
缺者補全亂者理君言檢書性所嗜精比揚金細擇米  
獲一義勝真珠船剖一疑如桶脫底康成寸策非八宗  
晉師渡河豈三豕倘非古本費研求訛以傳訛誰撫摛  
昌黎讀書先識字伊川凡事求其是胸中求此二義行  
點畫偏旁究原委當年簪筆侍青宮曾繪此圖呈 帝  
子饒斥邪蒿寓訓詞官名正字存微旨至今七十已懸  
車猶日孳孳勤不止摩研編削宵秉燭緣予朱文堆滿  
几非爲三教纂珠英定替六經作奴婢我聞古人老好  
學操夸孤與伯業耳更有南朝沈麟士八十手鈔八千

紙君今神勇欲過之直以邱墳當藥餌我愧賈山徒涉  
獵鉏剗苛碎愁欲死偶質所疑筵撞鐘大鳴小鳴應聲  
起也思北面就經師可奈顏光剩無幾他年文苑縱濫  
登儒林一傳君先矣

撫孤行爲畢尙書作

我聞郭代公四十萬緡脫手空又聞魯子敬指千園粟  
作投贈此皆周恤生前朋不如畢尙書待死友有深情  
諸公聽我撫孤行

一解

新安魚門子姓程字鼐園平生

著述千萬言重仁襲義人稱賢只有作家二字天性短  
玉卮無當不能盛一錢食翰林俸逋負如山長髯拂拂  
兩眉皺急走西方求佛救

二解

彤彤祖暑乘舡棧車烈

火燒其心炎風炙其軀行年六十胸煩紆望見畢尚書  
當作菩提如尙書迎入南衙居只道故人來不圖新鬼  
俱奄然一病遽委化瞑目而去片語無

三解

尚書親視

含殮泣下數行楊村爲藉幹祖免爲服喪三桃湯五穀  
囊一一布置加周詳柳嬰駢羅羽葆輝煌送歸靈輜白  
下葬旁人嘖嘖相誇張道如此異鄉死哀榮勝故鄉

四

解死者樂矣生者哭矣孤兒曾曾無棲宿矣尙書聞之  
又買屋矣可柰尙書官大梁孤兒居建業昏夜乞水火  
鞭長莫能及魚門平日交滿海內空紛紛誰管東里西  
華冬日猶衣葛練裘如枚百輩何足數只能代爲躅足  
仰望高天雲

五解

闕然明駝千里來黃金百鎰光燄燄

交與相城俠士章淮樹替主進替營財但許取子不取  
母十年以後交兒手

一解

七月二十四日隨園風和章

公挈孤兒載酒相過作畫紙券唱得寶歌頃刻金城千

萬丈崽子娉孀得依傍

七解

滿堂賓客額手再拜不信

當今古人尙在一叟無言搔白頭招阿遲來笑不休而  
翁縱死汝無憂汝不見畢尙書風義高千秋

八解

### 重宿棲霞感懷往事賦贈墨禪上人

憶甲戌春遊攝山荒崖絕磴窮嶙峋宮尙少金泥色  
古徑多生苔蘚斑歸將山景繩其美望山使相聞之喜  
擬割蓬萊左股來當作人才獻 天子拜表 丹墀請  
六龍經營慘淡召諸公石從地底搜雲片泉引天河下

碧空朱雲善畫

龍鑑

莊周巧

經畬

潘令栽花

涵

摩詰掃

發桂

更有徵歌置酒人桃花潭水汪倫好

楷亭

賤子從

公幾度來旌旗隊裏一芒鞋諸天月落猶分韻萬木霜

明更上臺果然

聖主鑾輿到一遊一豫

天顏笑松

聲有意學嵩呼石佛無言作前導相公三次展經綸奪

取西湖放寺門彩虹明鏡三千丈手折青蓮奉至尊

一朝入贊黃扉務猶自停驂來此處雪泥鴻爪認前因

馬亦驕嘶不忍去此事于今廿載餘白頭重到舊人無

黃公壚在山河遠東瀟城高銅狄孤剩有墨禪師一个

與談在事淚同墮今爲長老昔沙彌眼中無數浮雲過

攜手香臺處處遊滄桑萬種說因由青山也似人衰老

白鹿泉乾水不流

白鹿泉今無覓處

### 哭江蔗畦太守

才送花驄過石橋  
遠騎箕尾上丹霄  
吟詩雅欲追唐代  
作吏真能報聖朝  
清俸一箱書畫在  
生祠千縷佛香

飄飄襄陽片石江  
隄柳多少蒼生淚  
未消

君牧亳州作堤捍水人比之羊

公墮淚碑

客春賤子病空山  
幾度蒙公走馬看  
古鏡過時偏青照  
青琴舍我恰誰彈  
頻驚碩果風前落  
愈覺孤花樹上難  
腸斷郎君鳳池客  
麻衣如雪下長安

### 霞心庵看桂贈月初上人

棲霞四面環中心  
一庵聳入門鳥無聲  
諸佛但葉拱不

須旃檀燒自有木犀擁樓窗開一角金粟如海湧難將  
萬斛量恨不干手捧四野黃霧塞六時異香壅氤氲染  
衣裳熏炙入毛孔老僧尤多情煨栗相矜寵新雪落紛  
紛傳話談種種笑我七十翁晚歸心輒恐且辭月宮還  
殘花雙袖攏

寶華山

山門一路松直上寶華峯銅殿風霜古經臺草樹封律  
嚴齋鴿靜香散佛雲濃羣鼠都持戒來聽午後鐘華山  
風不  
避人  
晝  
行夜  
伏

棲霞古松無故自萎者甚多

千年古松葉四布一朝禿立不知故老幹雖招雷火焚

殘枝尙作蛟龍怒意欲人間作棟梁不貪冷處飽風霜  
甘心絕代擎天手付與樵夫說短長

### 哭家漁洲

年年蘭槩泊楓橋爲有吾家小阮招竹裏鶴留賓一榻  
窗前花勸酒三蕉同揮玉麈邀詞客沙斗代製金釵餉  
阿嬌此日思量如隔世碧天雲散雨瀟瀟

今秋正擬續前緣豈料山河竟渺然一紙訃來真膽落  
九原人去未華顛芸香空掩三千卷錦瑟誰彈五十絃  
賴有季方賢弟在好扶雛鳳上雲烟

### 憎蠅

深秋醜扇尙紛紛偶據高柯自道真枵腹可曾餐墨水



惡聲偏欲擾詩人神昏不附追風驥暑退能留幾日身  
辜負天教生羽翼枉鑽窻紙費精神

八月二十八日出遊武夷

半生夢想武夷遊此日裁呼江上舟  
抱文心傳九曲水搖花影正三秋  
神仙半面何時露錦幔諸君識我不  
擬唱賓雲最高調支筇直上碧峯頭

夜泊江山聞鄰舟有談鬼者掛而進之

夜船正寥寂聞客談齊諧知是鬼  
董狐掛而招之來客亦大欣然搖唇  
萬鬼集頃刻燈光青寒風射窻入天地  
亦大矣陰陽相乘除千寶莫道有阮瞻  
莫道無謝客真多情贈我勝絲竹得聞  
所未聞平生有耳福

過仙霞嶺

乍上仙霞嶺遙山漸莽蒼梯田高下種環水往來忙峽  
束人如小雲封路覺長輿夫先斂足取勢作低昂  
亂竹扶人上蒙茸但見烟千盤難度鳥萬嶺欲藏天古  
樹挈雲健重門鑄鐵堅分明兩戒外別自一山川

從浦城新鄉起行六十里宿剡口一路山勢奇險  
是武夷之先聲

簇簇青芙蓉對面開于朶頗似武夷君著渠來迎我有  
時形突兀雲中插箭筈有時勢盤紆長睂關婀娜遙青  
與天分近綠將人裹陵上更援下斷右忽連左灘聲萬  
雷奔松竹一亭鎖遠望樹深處茅蓬起烟火心忖是何

村今宵安歇可

漁梁道上作六絕句

一過仙霞兩耳無人聲都變鳥聲呼客中只與雞談好  
慚愧當年介葛盧

遠山聳翠近山低流水前溪接後溪每到此間聞立久  
採茶人散夕陽西

山腰通仄小車停竹作長籬樹作屏遠望自家行李過  
晝來都是好丹青

荒村小店歇征鞍上漏旁穿板壁單回首滿房金鴨暖  
夜眠却也一般安

劉郎才思本縱橫遊過名山氣倍清得句樂千得科第

急奔車下報先生

初筭蠻女髮鬢折得溪頭花亂簪一幅布裘紅到老  
不知人世有江南

崇安署中觀清獻梅

一樹偶然種千秋謚法加人皆思往哲天亦重孤花北  
宋風霜古南枝骨幹斜對君吾欲問琴鶴在誰家

夜告閣

事苦無人告朝朝告碧空香焚高閣上天在此心中有  
感雲皆散無言聽愈聰是誰瞞得過吾欲問崖公

到武夷宮望幔亭峯作

武夷宮前多古樹參天蔽日杳無數我來可惜宮殿荒

冠帔眞人多暴露一峯孤撐號曼亭其下戍削上隆平  
想見帝臺千尺石傳觴一夕來仙靈八月中秋月正明  
武夷之君駕玉輶招集鄉人童與叟開口曾孫喚某某  
過來多少事茫茫今宵且盡杯中酒招英妃兮鼓琴命  
妙容兮擊鼓手製雲霞藥七夾麒麟脯雲璈水瑟數聲  
來白鹿蒼龍一齊舞羽換宮移曲漸終五更玉漏響丁  
東唱到人間可哀曲湘弦齊斷月明中香風忽起彩霞  
捲羣仙去矣歌聲遠牽衣兒女盡哀號雲馬風車不可  
挽至今小別二千年石上蒼苔鳥跡滿吁嗟乎君兮君  
兮胡爲不再來豈不知望斷人間更可哀

試茶

聞人種茶當種田鄰車而載盈萬千我來竟入茶世界  
意頗狎視心適然道人作色誇茶好磁壺袖出彈丸小  
一杯吸盡一杯添笑殺飲人如飲鳥云此茶種石縫生  
金蕾珠蘂殊其名雨淋日炙俱不到幾莖仙草含虛清  
採之有時焙有訣烹之有方飲有節譬如麴蘖本尋常  
化人之酒不輕設我震其名愈加意細嚙欲尋味外味  
杯中已竭香未消舌上徐甘果至嘆息人間至味存  
但教齒芬便失真盧仝七碗籠頭喫不是茶中解事人  
從大王峯下乘舟入溪探九曲

溪南溪北山連連一曲二曲水盤旋三姑相逢疑玉女  
長城高障如鐵堅有藪不知誰放鏡有架不知誰挂冠

有竿不知誰作釣有槩不知誰拖船紅板橋名更奇絕  
長椽短杙相連牽分明堆架在岩穴何以不朽不墜千  
萬年疑是開闢以前乾坤壞此木逃出劫灰外又疑堯  
時洪水災人民居者巢猶在兩說紛紛世所疑唯唯否  
否姑聽之老身但願化猿鳥飛騰而上攫數枝可柰一  
波迎一波拒盤渦急浪來無數篙工只好隨波去扁舟  
小泊尙艱難何況中流作砥柱

灘水迅急篙工負舟而行余立石上相待

山似不許水脫逃多生怪石闌波濤水又怒石作阻撓  
終朝衝突聲呼號左騰乖龍石起蛟儼若格鬪三軍鏖  
馮夷列陣氣勢驕舟人一手難兩篙只得赤腳凌洄洄

負舟于背作擔挑滿艫盤盂齊動搖我時獨坐浪打額  
游興忽被性命迫令舟而徒登絕壁宛然鷗鳬立一隻  
帶濕搜毛風拍拍呼船速上來相逆千峯萬峯氣太逼  
遲恐老身化作石

登天游一覽樓覽武夷全局是夕月明如晝

千峯壓地地無縫三峯插天天欲動金鐘大鏞碧空墮  
醜犀怪象八蠻貢相角相倚洛蜀黨半伏半走鄒魯閩  
重重奇景散若麻天游一亭聚其衆武夷山脉多紆緩  
到此鋪張勢忽縱我坐兜籠門外來松柏排青夾成街  
三步一休頭仰看兩足騰雲身忘重羽衣道人下相揖  
灑掃高軒設清供正逢明月挂前峯手指金丸請客弄



水精盤裏漾青螺銀海光中走白鳳翠撲鬚眉影欲飛  
墜落九天風爲送果然化人解乘虛豈止張翥能鑿空  
酒酣茶罷榻上眠魂抱萬山同入夢吁嗟乎人生不遠  
遊如雞伏甕中果能窮宇宙自可豁心胸我今一笑告  
諸公此來不負遠行二千里此山不負婆婆七十翁

從金雞寨入小桃源

一聲金雞鳴滿山白雲起忽然絕壁開走入雲中矣其  
間別有天草屋相橫排稻田百餘畝僱租無官差四面  
山環之鳥飛不能上一二野人居有如麋鹿放可見世  
界海尚藏太古春何必陞彭澤思訪避秦人

至伏虎岩徧歷險怪景然有悟

世人談虎輒色變我忽見虎目亦眈青天豔被怪峯割  
猛獸欲同奇鬼戰更有虎舌重萬鈞手搖輒動雷聲聞  
高懸萬古不輕落此中奇理難具論我記兒時好鎔錫  
戲投水中皆壁立如臺如閣如峯巒亦復膠粘不欲仄  
苟明此理山亦然借此疏解何疑焉混沌未分水沙合  
元黃已判氣脉連偶然高下若鑄就非由人力非由天  
可惜天形大人形小山壽長人壽夭以致滄海桑田變  
化時不能在旁張眼看分曉遂覺化工有意鬪姦巧假  
使有生無死壽若毘鬻王翼若萬里垂雲金翅鳥看見  
乾坤開闢兩三回又能頃刻飛翔周八表自然一切仙  
船石匱虹板橋原委由來都了了

在舟中回望天游一覽樓已在天上

一樓高立萬峯巔遠望迢迢在半天昨日幸儂樓上住  
不然還道住神仙

草鞋嶺觀仙蛻手按之頭尙搖動

神仙蛻骨傳張徐峯高梯朽路莫踰只有草鞋嶺上仙  
真身未化形瞿瞿道人引我至彼處溪攢石簇途煩紆  
我乃跼足鼓勇上果有石洞如瓜廬洞中一叟魁踞坐  
非漆非土非皮膚叩之橐橐作聲響筋骨雖有脣鬚無  
齟齬閑殘齒牙腐雙眸垂下元珠枯我思精神天所有  
鋒隨刀盡歸空虛鬱茲枯腊遇好事裝飾凶穢驚庸愚  
聖人六經尙糟粕何況區區恒榦歟何不束縛瘞印隴

化臺兩字顏其墟仙雖不言如解語風吹頸動搖頭顫  
引路者云杜轄砦最險是前朝屯兵處攀援而登  
讀壁上吳中立碑記不覺失笑

天形蕩蕩寬到此忽然狹是誰造方城礮礮四面夾我  
懼作虎兇一束難出柙又恐化寶劍被人裝入匣洞雖  
分上下勢總環匝前賢碑記存細字可摩挲杜者杜  
塵緣轄者轄石硤云此讀書佳烟雲俱吐納如何詢土  
人謬以屯兵谷中塑杜將軍持刀披金甲拾遺訛十姨  
一笑口難合

從杜轄寨下行至雞母洞回望寨中樓閣如在舟  
中望天游也

渺渺樓仍在茫茫到已難人生高處下莫再仰頭看

雨過

雨過山洗容雲來山入夢雲雨自往來青山原不動

伏羲洞

絕壁森森古洞開羲皇曾此坐蒼苔想因細看橫排石  
悟出先天一畫來

鬪眉峯

青山有意鬪眉痕巧作彎環月樣新急取筆來描粉本  
還家重作畫眉人

換骨巖

每對黃庭眼倦看有誰能得大還丹吟詩骨與神仙骨

一樣天生換總難

老行

老行萬里全憑膽  
吟向千峯屢掉頭  
總覺名山似名士  
不蒙一見不甘休

飛鐘

何處鐘飛來挂空  
如碧瓦有意避人敲  
甘心萬古壓

晒布岩

山立如長城萬里  
一刀截有時緞女來  
晒布三千匹

黃竹

想尋黃竹到瑤池  
忽漫相逢在武夷  
王母曲裁歌罷後  
女兒箱未打成時  
三春作伴鶯尤好  
九月抽霜筍最遲

料得瀟湘雲水恨此君雖老不會知

宿紫溪聞雁

客館燈殘夢不成忽聞秋雁語深更非關畫角因霜落  
還似孤舟曳榜行千里關河方寂寞一封家信欠分明  
衰翁久斷人間事長觸翻嫌兩耳清

履霜

清霜一夜草鋪平遊子支筇踏欲驚葛屨不知何故響  
板橋先似有人行偶食身在松間立漸覺寒從腳下生  
不怕輕冰消息近藍橋吾欲訪雲英

到鉛山與程吳二友遊積翠岩

山川大固佳邱壑小亦好但須結構嚴便見化工巧我

遊武夷還重登積翠岩意謂齊魯遊定將邾莒嫌不量  
孤峯起長劍青天倚其下洞穴奇嵌空杳無底地仄氣  
易聚徑曲景愈幽始知河與海原宜納細流

### 石井

石井一泓水潺湲鎮日鳴無功能濟世只管自家清

### 冒雨宿射溪

數椽立水上四面凌荒灘征夫爲雨窘到此更已殘衣  
裳類戰罷汗透濕中單然糠急自燎倉猝何由乾野菜  
購盈把輿夫同一餐有燭不能秉風中爲燈難有帳不  
能支雨中爲客寒權把旅店臥當作行船看驚疑窗外  
響魚龍來問安



蘆花

虛負花名色不嬌  
漁翁舟過幾枝搖  
風前作絮秋將老  
江面鋪霜午不消  
羞與吳綿爭冷暖  
甘從潘鬢學飄蕭  
天涯有客開箱嘆  
欲取寒衣路正遙

紅葉

武夷高嶺曉霜濃  
楓葉離離色不空  
草上有時隨意落  
花中無此可憐紅  
非關冬日行春令  
直把臙脂寫醉翁  
我欲題詩學宮女  
柰無心事訴秋風

坐蘿蔦船到西安

蘿蔦船輕似鳥翔  
喚來小坐趁朝陽  
水深五尺碧于玉  
橘滿千林紅映霜  
篙打亂灘雙耳鬧  
碓舂空屋一輪忙

溪邊簾底炊州起疑是溪雲墮滿船

憑欄

鎮日憑欄一笑生世間萬事莫分明溪河石子豈無數  
可有神仙數得清

重過玉山感舊

玉山平遠路斜長五十年前此束裝店主已經三代換  
征夫重作一宵忙飛鴻踏雪痕難覓司馬題橋夢未忘  
弱冠風情當日景不堪轉盡九迴腸

屏風館詩爲霞裳作

玉山東下屏風館茶肆盈盈春色滿劉郎慣聽唱新波  
穩坐羊車頭不轉輿夫貪喫六班茶引入長陵小市家

竹徑白飄千點雪，茆亭紅出一枝花。  
抽觴有女來相迎，口是杭音張是姓。  
斜溜嬌波目不停，驚郎玉貌將奴勝。  
郎意三分妾十分，瑤光奪壻今宵定。  
行李先行郎未行，探懷無物贈傾城。  
自憐螢火單身客，那有庚桑一宿情。  
佳人暗啓縷金箱，代取纏頭賜阿娘。  
挑燈親製黃昏散，把盞同餐窈窕湯。  
千金一刻呢呢語，戒體摩挲心更許。  
三更問字學侯芭，一局彈棋輸玉女。  
郎與奕大北夜漏難將海水添，汝南雞叫五更天。  
願甘同夢情何極，怕悞行期起更先。  
班馬已經嘶陌上，弓鞋猶是立門前。  
天涯分手太匆匆，落月啼烏盡惱公。  
何日柔卿能解藉，何時阿軟得重逢。  
劉郎歸向舟中坐，細說前因淚潛墮。  
老我聽來

原不禁教郎身受如何過回首蓬山路已遙  
勸郎自惜  
莫魂消冶容易惹天花染莫再他生作宋朝

七里瀧

七里瀧深草樹疎青山匝匝水環紆老翁白髮手雙漿  
全著女兒喚賣魚

哭蔣用庵侍御

夷甫曾看裴楷終我來君去太匆匆故人不及春宵雪  
一夜猶能待曉風

彈指交情五十年回頭水上過輕烟不能忘記春明夢  
折柳題襟小雪天

膠青刷鬢好容儀袍褶衣圭一剪齊安置屐褰都得所

風裁誰似謝征西

手持玉尺領文星  
驄馬嘶風萬里行  
聽說牂柯千尺水  
至今猶遜主司清

遊子前年返故鄉  
白頭人送滿天霜  
也知此會成長別  
別盡銀燈話尙長

兩家食譜有成書  
每到筵開折簡呼  
今日奠君真草草  
可能勉強一嘗無

來遲九日便離羣  
恨是三分悔十分  
賴有陳遵尺牘在  
開看一字一逢君

將君手扎裝潢成冊此番帶至杭州而君先九日亡矣

留別杭州故人

飛鳥猶知戀故都  
我來心欲別西湖  
賈生詣闕當年早

丁令還鄉此日孤聽笛事雖隨夢遠看花身未要人扶  
且將滿目河山意徧訪黃公舊酒壚

胸中屈指故人家處處敲門日未斜強半兒童呼大父  
相看風貌類孤花高談誰聽開元曲乍到人疑博望槎  
問比昔年台宕返髭鬚又自幾多些

瀧岡阡上草如茵歐九時時暗愴神苦爲他年謀祭掃  
誓同鄉里結婚姻新豐雞犬多相識故土枌榆倍覺親  
可奈西泠無片瓦九原應恕不歸人

班荆道故日匆匆頃刻天涯又轉蓬此會自然非偶爾  
他生還要遇諸公三千世界花同落十二因緣事未終  
天意亦憐垂老別連宵不起挂帆風

寄同年阿廣庭相公

一紙西川奏捷書，凌烟閣上有誰如。  
功成鳥道千盤外，身是金精百煉餘。  
天子龍行郊勞禮，王侯爭逐上公車。  
欣看麾下從征士，都藉風雲到玉除。

郇伯旬宣物望隆，年年車馬自西東。  
春深似海方調鼎，事重如山又借公。  
治水魚龍聽號令，安邊刀劍挂崢嶸。  
有緣最是西湖月，三度旌旗照眼紅。

聽說裴公兩髻絲，精神還似受降時。  
中天運好夔龍健，首相心勞管葛知。  
愛惜人才都爲國，平章花月偶吟詩。  
師門風義殷勤甚，屢問人間杜牧之。

鰈生榜下便離羣，畧記威容一二分。  
身賤龍門雖灑掃，

熟高鵬鷺易傳聞青山木落人空老黃閣風和日未曛  
莫道巢山真嬾散也曾終夕望卿雲

題浣青夫人詩冊

名孟錫字浣清常州錢文敏公女也

絕妙金閨詠絮才一生詩骨是花裁分明擁髻揮毫際  
別有心從天外來

尺五真疑戴皂紗風裁不似女兒家也因氣得江山助  
簪盡秦關蜀嶺花

已隨夫婿縮銀黃更見嬌兒步玉堂天爲佳人破常例  
清才濃福兩無妨

而翁南下賦歸歟適我新婚北上初水面匆匆通數語  
懷中正抱女相如



重提春夢最消魂老去尤驚日易曛難得相思竟相見  
宣文君與武夷君

臘月七日蘇州張君止原招遊靈巖山館次日往  
寒山天平登中白雲看雨

張敷今逸士招遊古靈巖龍頭大編搖不畏雨廉纖日  
短河流長到山天已暮返持懸火遊亭臺歷無數肴烝  
既甘鮮賓從尤妍雅謂徐沈論古兼評詩玉屑紛滿把  
五丈斬王碑九曲舉公園藉君作導師使我得窺觀

次日往寒山山寒冬更寂紺殿與琳宮鎖閉無由入扣  
門久不應寺僧頗可想祇道無人來豈知有我往枯葉  
瑟瑟語凍泉微微鳴分明千尺雪化作一團冰朔風挾

而至滄雲吹滿地不待晚鐘撞行矣各挽臂

張眼貪看山滿身不知雨餘勇遊天平持繖遮苦履白  
雲分三層我竟登中峯無梯天難上有罅路可通誰把  
石笋插壁立將人壓豈徒雙鳳銜直是二婢夾歸來謝  
主人躍躍興未了我不厭山高山不嫌我老

贈吳如軒

有序

如軒齒猶未也忽以狀來屬爲立傳蓋懼余之  
衰而他時秉筆之無人也按古人生傳甚少除  
昌黎于何蕃溫公于景仁外絕不多見至于梓  
人丐者則是借彼爲寓言非其實也但良友護  
諛勢不能已乃取其生平大槩韻其辭而贈焉

庶幾千載後讀此詩者如見其人并以質之現  
今海內之識如軒者

釣魚須釣海上鰲結交須結扶風豪吾友如軒古俠士  
仰空一笑天爲高身著黃衫走吳下春宴春遊窮日夜  
挾彈桓東年少塲投楚子野公城舍朝廷命採赤堇  
銅鞮商低頭拜下風海船裁裁天外去姓名直到扶桑  
東上至公卿下屬養置驛通賓相識廣傳呼某到合座  
迎一紙書飛應若響有時指困助賑災闔門沿路無瞻  
孩有時周卹友朋急千萬黃金手一擲山塘十里女如  
雲稱觴上壽來紛紛一枝新花開出色蜂蝶爭先報與  
君張燈讌客花如海冶葉倡條憑客採歌終不怕月沈

西城呵自有金吾待與我交情廿載餘白頭把手各相  
於每當玉漏三更盡帳外猶聞訊起居看君酬應忙如  
箭感君處處能周徧豈徒咤叱廢千人直可精神當八  
面殘臘匆匆遽返山自慚才盡詠君難且貽越石并州  
調當作朱家本傳看

題張熙河孝廉梅花詩話卽送遊峨嵋

熙河孝廉真奇士自言生性無他嗜好同山水結良緣  
慣替梅花作花史穿穴寒香二十年梅詩梅話手親編  
蠶眠細字盈萬千字字皆帶梅花烟君貌清癯如鶴古  
見訪隨圓月端午隨園七百七枝梅望見君來一齊舞  
送君西遊巴蜀中折梅相贈行匆匆好將五月江城笛

吹上峨嵋第一峯

附霞裳和詩

紅葉

驚心最是滿林楓底事皆成醉客容青女曉辭紅日  
去朱顏常被白雲封飄零時響空山路墮落才逢古  
澗松我欲題詩先煮酒摠衣白掃葉重重

蘆花

蕭蕭一片荻花稠憔悴江濱早白頭映月慣招鷗作  
侶隨風悞上客行舟如棉不肯因人熱落絮寧甘付  
水流知否楊花翻羨汝一生從不識春愁

履霜

侵晨上嶺滿途霜紅日將升未吐光  
殷齒留痕誰更  
早馬蹄怯進我知涼遙山望去頭微白  
野徑行過草  
露黃最是負耕人太苦糾糾葛屨走危岡

聞雁

夢返孤舟月影西忽聞征雁語聲悲  
同懷離緒輸儂  
遠可有家書報客知訴出旅愁雲裏  
聽喚醒霜角枕  
邊吹寒檠一點燈如豆頗似長門夜坐時

小倉山房詩集卷三十二 丁未至巳酉

春日偶吟

萬里遊歸說武夷江山成就六年詩而今自笑無遊處  
閒步柴門數竹枝

三雨人家設綺筵招儂同醉落花天緣何不掃陳蕃榻  
生性吳蠶怕獨眠

春暮陰生滿苑苔曉風吹急小窓開濕煙繞瓦雨剛去  
寒翠幾人山要來

草木爭春各不同碧桃文杏兩般紅竹因葉密聲招雨  
蘭爲香多性愛風

堅冰乍散水生煙小草知春比樹先荷葉自舒蕉自捲

性情生就總由天

攏袖觀棋有所思  
分明楚漢兩軍持  
非常懽喜非常惱  
不着棋人總不知

明窓淨几太嫌多  
無計分身喚奈何  
只好安排閒筆硯  
聽憑老子自婆娑

不獨憂除樂也除  
衰年事事付空虛  
聽來忽有心開處  
鶯轉高枝兒讀書

支頤閒坐可憐宵  
何處旃檀遠遠飄  
鼻觀氤氲心忽靜  
方知香要別人燒

白髮蕭蕭霜滿肩  
送春未免意留連  
牡丹看到三更盡  
半爲花憐半自憐



浮生何必苦安排  
隨意閒行心自開  
失物每從無意得  
懷人恰好有書來

幾個傳人占古今  
浮雲何處問升沉  
杜家兄弟多榮貴  
官小名高是阿欽

逝者如斯喚奈何  
桓伊何必定聞歌  
數來傍晚星何少  
過去飛鴻迹太多

### 戒詩

戒詩如戒酒  
屢戒復屢開  
又如茹素人  
欲炙涎流腮  
蠶絲一以抽  
金刀不能裁  
始知性所囿  
一旦難相乖  
江淹才已盡  
白傅興方來  
詩中有馮婦  
叟其自號哉

笋方作竹  
多有菱者  
名之曰竹殤  
而弔以詩

羣竹方凌雲其中數枝傷頗似楊家烏無端忽暴亡人  
世有嬰鬼園林有竹殤壽者是何幸夭者是何殃與其  
生不育何如勿生良栽培傾覆意何處詢蒼蒼

嬰鬼見  
易林

### 栽袍

閒居無所事緩步自逍遙底事栽袍短平生怕繫腰

### 夕陽

水竹光雖滿桑榆景已斜夕陽不肯去想是戀桃花

### 灌花

久旱天無雨呼童汲井陰雖然杯水力也表惜花心

### 嘲畏熱者

君莫畏炎風炎風期漸滿不及待秋涼除非君壽短

冰

一片輕冰到蒼蠅盡轉身許儂登席上能救熱中人

六言四首

酬應則吾老矣嬉遊則吾尙少老少憑儂自爲不免旁人一笑

夏五日長如歲況兼無事閒居傍晚回思早起宛然三代唐虞

一切總求徹底便生無數疑端不若半明半昧人間萬事相安

宣尼待子如客想見胸襟灑然不是趨庭獨立聞詩聞禮何年

題駱秀才乞食歌姬院圖

乞食平康一笑生，衲衣手板拜卿卿。此中定有憐才者，較勝王侯門下行。

冷炙殘羹味若何，妝樓行慣有誰呵。只愁一碗桃花粥，中有佳人紅淚多。

造生壙

莫笑先賢造化臺，何人不向此中來。譬如華屋身將住，可不梅花手自栽。三板暫教風月閉，一門且待子孫開。香山墳畔泥濘酒，先與羣公醉幾回。

重赴泮宮詩

有序

余以丁未年入泮，今又丁未矣。仿重赴鹿鳴故

事作歌

憶昔袁絳年十二簪筆學趨童子試門前已送好音來  
階下還騎竹馬戲其時學使王交河面取經書諷信多  
李泌圍棋雖未賦何郎雅樂已能歌一番正試兩番覆  
道路爭觀人簇簇喧傳泮水出芹芽艷說童蒙禿棧樸  
巍巍雙闕聖門開將命疑從闕黨來並行敢逐先生後  
受業師史玉瓚先生同入學倚寵仍眠大母懷諸姑伯姊欣欣到替  
我梳頭向我笑看著青衿試短長勸拖錦帶休顛倒恭  
逢先帝御明堂服采新頒詔數行已入黌宮換短  
褐更教雀弁耀銀光雍正四年奉旨各官帽上東家  
加珊瑚水精諸頂生監用銀咎兒苦相羨西家奪壻招相見童子翻增滿面羞佯採

花枝弄筆視此事于今六十年茫茫滄海過雲煙阿婆  
喜說新婚日羸馬驚聞上苑鞭膠庠舊伴今誰在孤花  
碩果真無奈寄語新知衆秀才老身願作同年待特設  
隨園酒一卮強顏首唱泮宮詩從來白髮傷心處最是  
青年得意時

哭慶兩峰觀察

有序

丁酉七月兩峰觀察赴任湖北過隨園留別云  
交情共指青山在別意相看白髮多余讀而傷  
之旋聞以孤身出鎮塞外非其任也不逾年病  
還京師又一年卒余賦詩哭之卽用其第四聯  
爲起句

別意相看白髮多今朝永訣奈君何平原自是佳公子  
劉秩原非曳落河翠竹凌霄難鬱抑良金受鍛易消磨  
可憐絕代風騷手空把穠華委逝波

假山成題曰巫山十二峰自嘲一首

看徧真山造假山公然十二好煙鬟如何老去風懷寄  
還在高唐雲雨間

書所見

人老惜分陰一日如一歲但問一歲中幾度得心醉人  
生行樂耳所樂亦分類但須及時行各人自領會我生  
嗜好多老至亦漸忘惟有兩三事依舊懽如常攤書傍  
水竹隨手摩圭璋名山挾一杖好花進一觴談文述甘

苦說鬼恣荒唐七十苟從心踰矩亦何妨

形神偶相交忽然竟有我及其既散時空雲無一朶來  
非我有心去非我有意物物有一生人人有一世所以  
達觀人遊行在空際來共雲卷舒去隨風搖曳不談佛  
與仙恐受彼拘繫既已說長生何以悠然逝既已悟無  
生何必又詞費

水精屏歌

有序

香亭弟假水精屏一架爲老人消暑喜賦一詩  
寄之

六月溽暑天炎烝間連貽我千水精爲盤爲盞爲盆罍  
高低錯落架作屏使我老眼如再明急陳座右當瓊英



蒼蠅遠望雙目惺側翅欲上飛又停兒童聚觀喜且驚  
欲摸怯寒手戰兢我聞琉璃世界夸晶瑩佛家妄語未  
可聽又聞冰山雖高容易傾誰能倚恃爲長城何如此  
寶羅階庭如白龍皮挂迎涼廳頃刻習習秋風生峨嵋  
之雪萬古凝藍橋之霜飛滿楹陽烏欲闌氣不勝銀蟾  
下囑疑繁星三更尙作長明燈客來相對心怦怦人人  
都化聖之清我覺下筆尤空靈頭銜豈止一條冰

對書嘆

我年十二三愛書如愛命每過書肆中兩腳先立定苦  
無買書錢夢中猶買歸至今所摺記多半兒時爲宦成  
恣所欲廣購書盈屋老矣夜猶看例秉一條燭兩兒似

我年見書殊漠然此事非庭訓前生須夙緣名將不兩  
代文人無世家可憐袁伯業對書空嘆嗟

荆楚歲時記七月八日雨名洒淚雨蓋調牛女也  
戲和香亭五絕句

才過七夕雨如絲說是幾星別泪垂怪底淒淒聲不響  
想應瞞着怕天知

烏鵲橋空行路難銀河風急起波瀾織來雲錦三千疋  
儘拭啼痕恐未乾

惹他兒女盡消魂都想乘槎一問津侵曉夫妻兩行淚  
不知先落是何人

雨散雲飛夢易乖人間多少別離哀倘教都學黃姑樣

海水還愁天上來

誤殺匏瓜樂未央生來無匹影幢幢有情便有年年恨  
就作天星莫作雙

極淨之室日光炤處濛濛然碎塵忙擾感而有作  
漫空野馬闇紛紛  
牕漏朝陽看便真  
我覺伯夷清不必  
人生一世在紅塵

爲花樹掠蛛絲有感于運氣之說

艸木都須氣運扶  
旁觀只少靜工夫  
灰絲蛛網欺蒙處  
病樹常多好樹無

得玉尺詩

有序

余失去案上玉尺尚不知也忽陶怡雲持來相

示方知被客攫去轉售陶家怡雲素識此物卽  
以歸趙余嘆造物之巧感友誼之重不能無詩  
一條玉尺廿年持忽起波瀾匪所思失去未曾三日別  
得來如有六丁追量才事業慙無分返璧心情喜可知  
不是曹公風義重文姬歸漢是何時

附陶怡雲和作

偶逢寶器落風塵知是隨園席上珍璧返相如原有  
數珠還合浦豈無因物多著意求難得巧到無心樂  
更真容易量才持玉尺若除公外竟誰人

九月五日招春圃香亭觀芙蓉兩弟俱以高官解  
組乍見煙雲花草意倍欣然各以詩見寄余賦七

絕句荅之

秋雲遮日樹遮風同看芙蓉上短篷  
難免芙蓉花一笑弟兄三個白頭翁

天邊消息近重陽花正迎霜未拒霜  
十斛胭脂千匹錦秋娘臨水盡紅粧

消遣閒情弄釣槎招呼網戶挺魚叉  
登時潑刺銀刀響撲斷青蘊幾節花

細雨濛濛濕小舟貪看花色尙回頭  
可知客把芙蓉戀不是芙蓉把客留

謝傳無官倍有情愛拈棋子鬪輸贏  
千秋乞墅添佳話今日羊曇又外甥

兩弟與健莽甥對奕

看罷芙蓉坐小齋自家棠棣又花開家常鷄黍燈前供  
也算紅雲宴一回

送別殷勤語阿連最難平地作神仙希文經畧西邊日  
再憶圭峰定惘然

題漪香夫人采芝圖

附來書

月尊周氏端肅問隨園先生萬安尊讀先生之  
書十有餘年矣又時時聞中丞道先生言論丰  
采口無虛日海內老師宿儒奇才異能之士至  
中丞左右者莫不盛稱先生之才其在先生同  
輩諸公亦極口贊揚予無旣尊覺耳目所及海  
內名流無若先生者矣尊凡陋之質叨侍上公

中拂身世無復所憾惟幼耽翰墨妄生好名之心不肯泐泐終世乃生少聰明兼多疾病蛩寒蟬寂終不成聲于今悔嘆廢棄始信天限之弗可渝奪又無絕技殊能高于輩行可託傳于名人著述以垂永久他日晏然隨化慙然神傷而已前在中州取義山十年長夢采華芝句作采芝圖畫工既劣更不能擇手題咏誠無可觀今特寄呈求賜宏製斯人斯圖雖不足當大方題品誠欲藉傳姓氏于集中則生平之憾始釋然也小兒嵩珠年甫三歲近已種花以爲遲郎福命宜兄弟所致先生與中丞誼重交深聞之必

喜用敢附及冒昧干請臨啟惕然附呈微物導  
意

空山雪花飛滿地雪中一葉仙書至道有真靈位業圖

教儂小綴蠶眠字開圖驚見魏夫人蝶繞雲鬟花繞身

手采靈芝覓仙種果然天上降麒麟謂公子欣傳嫁得

尙書珩明珠九曲穿無數朝衣熏罷便題箋寶髻梳成

還作賦尙書愛士古人同海內名流走下風誰知日具

千人候都是周家絡秀功尙書署中客無不頌夫人賢山人欲乞簪

花格特寄隨園圖一冊上元靈笈未曾披玉女真容已

先得方以隨園雅集圖索夫急燕旃檀十斛香拜乾阿

嬾喚蓉祥阿還寄夫人勝下取名蓉祥偷描一幅天人貌供向慈雲



大士旁

荅似村以詩見寄

屢接吟箋喜不勝珍珠圓轉水雲清心從天外來千里  
人在詩中過一生字寫燈前應落月信傳江上正啼鶯  
宛然不繫舟邊立嗟嗟邱君笑語聲

海內何人不贊嘆雪中南北兩袁安漁歌鎮日憑闌聽  
棋局千盤袖手看我已白頭遊五嶽君方紅日臥三竿  
冀山人物從來少生長侯門隱更難

題成嘯崖夢遊清涼山圖

人生惟有夢最好千山萬山許搜討縱有蕭何法律叔  
孫儀難把夢魂管得了金陵諸山清涼高嘯崖公子人

中豪忽然夢到清涼頂是誰相約誰相招露戎戎兮鋪  
草亭高高兮凌煙松蒼蒼而蔽日江遠遠以浮天待天  
雞之喚醒仍枕席之依然清晨大笑告吳友吳也驚疑  
但掩口道是昨宵我亦夢來遊底事路上雲遮不拱手  
毋多談且載酒果肯尋夢夢還有呼車同向清涼走指  
看今日諸煙繚還似昨宵光景否雪泥鴻爪怕消亡請  
付丹青傳不朽我聞古莽之國以夢爲是覺爲非列子  
此語不我欺嘯崖此夢亦如之又聞天姥之峰李白遊  
夢中詩句傳千秋得毋嘯崖前生卽是李白不我家清  
涼山腳下山神昨日來相訝說丁未孟秋詩人兩個都  
過隨園門如何不速先生駕

題吳秀才醉竹圖

竹醉露人醉酒詩人生在竹醉日似與此君相識久  
科頭獨坐萬竿中奴捧酒壺不放手把竹數一枝取酒斟  
一斗澆竹便爲竹葉春自飲便爲竹林友竹醉人扶竹  
不知人醉竹扶人知否是人是竹渾難分一醉之外別  
無有此之謂與天爲徒與物化君不見藕中之仙橘中  
叟

插芍藥數枝詩示香亭

數枝紅藥膽瓶斜頃刻蕭齋變館娃心醉異香如中酒  
眼驚神女轉忘花翻階尙記中書省多寵還輸小宋家  
我亦將離人世客賴卿相伴送年華

香亭插芍藥三十六瓶喜以詩賀

阿連春想一肩擔羅致名花露正酣三十六瓶香欲湧  
百千萬朶色相叅藏嬌不惹諸姬妬絕色何妨儘力貪  
半世黃金擲虛牝者番擲得最心甘

左足病瘡作

雙趺虛左便無聊欲走堂前怯路遙甘把足拳師野鷺  
只愁人老變山魃千峰踏月心還在七步成章興已消  
何日浮圖重起甃白雲紅葉一肩挑

戲荅香亭弟問足疾

知君手足最情多問我蹢躅足若何我學禽言吟向汝  
道行不得也哥哥

松頂立一白鷺賦詩贈之

飄然白鷺鷗風中不知冷有意示人清獨立青松頂汝  
身閒若斯汝立高若許知否紗窓中有人羨殺汝

哭李猗南

諱開第

君官石城北我家小倉山相離未三里車騎常往還君  
年逾花甲鬚髯未曾斑疑有仙家術遊戲在人間春秋  
風月佳彼此具盤餐看花至日晷說鬼到更闌吏隱雖  
分途言笑常同懽不圖半月別已作千年看我在吳得  
信驚駭摧心肝願喚黃仙鶴騎之叩天關但許贖此人  
百身非所難

我昔遊珠江迢迢五千里歸來老妻言李君真俠士袖

攜一笏金來賜雙稚子教以勤讀書助其買果餌我聞  
世俗交分手便忘矣君胡獨不然體卹同毛裏未受主  
人托能使舉家喜我忝長十年而乃後君死有如報恩  
雀含環向誰視感君不能忘思君不能止惟有淚兩行  
彈入湘江水

贈蘇州奇麗川方伯

皖江官舍接風標桂嶺重蒙折簡招衣上酒痕香未散  
燈前花影夢難消寒梅老更思春切倦鳥飛偏怕路遙  
恰好天心稱人意一輪卿月照楓橋

謝方伯贈春衣

清遊已屆嫩涼天未帶春衣意惘然偶漏一言緣酒後

竟蒙雙襲賜尊前輕華似挹浮邱袖長短剛宜子貢肩  
惹得山人忘歸去披來又泛五湖烟

留別蘇州故人兼寄汪硯香太守

兒時遊已愛蘇州七十年來幾度遊鄧尉梅花開似昔  
金閭舊雨冷于秋追尋往事雲同散照到斜陽水亦愁  
身愈頽唐心愈健寒山兩上未甘休

紛紛人看魯靈光談到風騷老亦忘烟墨亂揮千幅紙  
笙歌環擁一頭霜敢云名重蕭夫子可奈情深白侍郎  
多少吳娘乞詩贈登車猶自挽衣裳

五茸三泖久聞名難得汪倫打漿迎隱士遺書尋笠澤  
先生新饌試蓴羹花光引我村村到天意憐人日日晴

十里橫雲山下路風廊水榭記分明

出門兩月賦歸遲惆悵郵亭酒一卮佳久易生臨去恨  
年高難說再來期節過寒食春將盡人到忘家樂可知  
寄語諸公各珍重明年此日最相思

喜晤龔華厓明府

作宰湖湘四十年歸來小住板橋邊原思底事貧如此  
龔遂須知政可傳久別師生如隔世重逢鷄犬欲疑仙  
匆匆又向長安去此會今生豈偶然

人間萬事等搏沙說到金陵更可嗟白髮尙存前令尹

烏衣不見舊人家鉛松作貢途雖遠

時運鉛  
京師

印綬還鄉

氣尙華莫忘兒時讀書處參天一樹海棠花

君家海棠  
爲金陵第



和香亭別芍藥詩

紅藥欄空意惘然  
白頭人坐散花天  
枕邊已醒黃梁夢  
座上還飄紫玉烟  
小剩半枝如戀主  
多看一刻當留仙  
明春約汝開宜早  
我是衰年弟少年

秋暑

熱客不知老天公  
忘作秋何留霜露降  
尙見火雲流桂  
有爲薪嘆人難秉  
燭遊從今才省悟  
絺扇莫輕收

孫子瀟抱西河之戚繪佳兒重生圖索詩

望子臺空最惱公  
孫郎何處哭秋風  
畫師真有通神筆  
一個童烏活卷中

楊柳依依水竹居佳兒獨立意何如披圖乍見聰明相  
還想詢他讀甚書

哭似村

有原

尹文端公諸公子俱好學能文官亦顯貴惟似村  
以秀才免差使長侍公于制府署中與余往來尤  
暱性愛吟詩別二十年所寄箋素裒然寸許余羸  
老也有來無往今春始寄荅二章詩未到而似村  
亡矣

才把懷君詩寄君詩猶未到計先聞浮萍尙想重逢日  
駟馬難追已散雲絲繡平原空有畫

隨園雅集圖五雁  
人中若其一也

飛遼海漸無羣

三二兩公  
子先亡

衰翁諒不多時別只羨離亭

手曹分

蕭騷風骨有誰同  
生就人間張長公  
調鼎兩朝門第貴  
高吟一世秀才終  
題襟山館燈頻剪  
握手軍門雪滿空  
今日思量可能再  
幾行衰泪付秋風

再贈奇方伯

衰翁扶杖耳頻傾  
來聽吳儂說政聲  
能以直言匡大府  
不將初念負蒼生  
吟詩偶愛閒風月  
報國能留真性情  
羞把封疆祝賢者  
知君心早薄公卿

王若農蓬萊閣讀書圖

蓬萊閣下王喬坐  
萬卷書橫都讀破  
誤認三更海日生  
誰知兩點魚睛大  
高咏新詩寫壯懷  
蛟龍傾耳嘆奇才

至今落筆興酣際尚帶扶桑風雨來

到清江贈河帥李香林先生

西平兩代有名賢萬里黃河付一肩持節能平行地水  
前生原是渡人舡羊公雅度飄囊帶謝傳中年愛管絃  
奏罷安瀾無底事龍蛇驅上行波箋

公工詩善書

仰止高山三十秋今宵才喜識荊州慚非國士蒙青眼  
惜傍龍門已白頭海上蟠桃消息近

逾月公花甲矣

公尊前叢菊

晚香幽感公情似青天月送過黃河尚未休

公命所坐舡護送渡河

李公贈詩

景仰中懷時緬然而今甫得晤高賢文章久已驚寰

海風雅應知屬大年吐慧片時比雪艷留香滿座勝  
花妍塵勞面目慚相對幸接芝顏的是緣  
野鶴風琴共一舡江淮爭識地行仙烟霞性格多知  
已花月情懷入詠篇常愛碧山恣逸興每開青眼爲  
才憐探竒欲往雲臺去落落能全自在天

沭陽呂嶧亭觀察招遊舊治十月五日渡河宿錢  
翁家次日寓萊園作

一條黃河流隔斷江南界我忽渡河行直到錢家砦人  
生最樂事所蒞還能再況我宰潼陽四十六年屆錢翁  
出相迎不信我還在張燈照客顏認定方始拜道別年  
才髫于今年已艾重逢固可喜久別毋乃太我亦自孤

疑此身來天外笑問君家中兒孫已幾代

賢哉呂大夫候我十字橋乘馬亦有情歡鳴聲蕭蕭衣

冠數十輩簇簇來遠郊敢云有遺愛能使諸公勞亦如

觀古物人情爭相邀高城忽森列

從前沐陽無城

市廛尚煩囂

微聞兒女言袁公去已遙如何飄然至如鶴下九霄毋

乃武夷君來把曾孫招

次日詣縣署重尋所居地某屋高堂樓某庭姊妹戲恍

惚有聲容呼之如欲至書齋柳雖枯根盤尚雙峙是昔

吟詩所摩挲自隕涕

少時梓雙柳軒詩

皤皤兩吏來歷歷談我

事何獄我平反何村我賑濟明知黃梁夢已醒何須記

終竟兒時書重聽覺有味我已入輪回一世如兩世

召公官山右賢聲人所仰能歌白華篇萊園將母養方  
池水漣漪高臺月是朗招我榻其間良醞日相餉深夜  
談古今百史瞭如掌秋儲奕縱橫陳耕堂廣文詩個儻  
朱竹江更有延陵吳書畫具精賞吳南晦招我虞溝遊  
遂忘雲臺往良友貪合懽名山付虛想留此未了緣重  
來或者倘

過虞溝題虞姬廟

姬故沐陽人也

爲欠虞姬一首詩白頭重到古靈祠三軍已散佳人在  
六國空亡烈女誰死竟成神重桑梓魂猶舞草濕胭脂  
座旁合塑烏騅像好訪君王月下騎

留別驛亭觀察

十日平原飲正豪一聲班馬又魂銷甘棠樹下惟君在  
相送相迎舊板橋

迎何懽喜送何悲芳草多情戀落暉人自回頭車自走  
淚痕彈不上君衣

贈遺無物不橫陳水碧金膏炤眼新自笑侯嬴忘却老  
白頭還作受恩人

十畝方塘水石幽風廊月榭菊花秋爲貪金谷勾留好  
不向雲臺作遠遊

浮生聚散等搏沙况復衰年日已斜只恐黃河攔不住  
夢魂還會到君家

巳酉元日香亭以詩見寄依韵答之



筆花開向早梅先知道能詩有阿連昨飲屠蘇才改歲  
今看爆竹尚留煙兩淮遊屐歸千里七十過頭又四年  
尚有閒情品書畫招君來作米家顛

元日敲門便送詩好懷報與老人知不看荆楚歲時記  
但唱玲瓏絕妙詞春色一庭香雪在花箋兩個玉人持  
祝君歲歲長如此較勝徘徊領郡時

荷塘明府和香亭詩見寄余疊韵答之

揮毫元日寄焦先不信人間吏卽仙百里花封無案牘  
一枝彩筆有雲烟家傳風度追前哲詩覺工夫勝昔年  
滿紙龍蛇飛欲動判詞爭怪乞張顛

還山已載滿舡詩又見詩來樂可知身不賀年心恰到

遣人持名  
紙賀歲

老防僭坐酒先辭珠璣耐我千回讀硃墨輸

君一手持指日梅花開有信可能來看月明時

青州都統慶雨林世講集唐詩見寄且索和章甚

嚴

幾度瑤華托雁奴將軍心愛白雲夫催詩急似徵兵餉  
集句嚴於演陣圖眼看狼烟消渤海手揮珠玉寄菰蘆  
如何荆樹連年折門裡風人兩個無

謂兩峯似村

山河從古說青齊萬丈雲門待品題老去應嫌金甲重

分飛可記玉人啼

吳門故事

花間舊事誰能說夢裡相思路

易迷安得泱泱大風起吹君直到秣陵西

答碧梧夫人

附來札

夫人名雲鳳字碧梧吾鄉台宜觀察之長女余  
年十四與其曾祖諱陳典者同赴已酉科試今  
六十年矣夫人自稱女弟子和余間別杭州詩  
見寄來札云前歲星槎回里假叩謁之無緣恰  
喜錦句傳來幸芳塵之可步會和短章恭求鈞  
誨竊謂先生鍊金點石之才必有微噴發矇之  
賜乃間貯於案頭將欲登諸集上得月丹砂雲  
鳳雖爲一時之幸緼收魚目先生恐低千古之  
名且崔汪二夫人久已聯珠合璧安敢雜以批  
繆而間閣諸女伴亦有碎玉遺金何堪並收瓦  
礫雲鳳得蒙清訓已列門牆奈在弟子之班妄  
竊詩人之號自顧庸庸增慙汗問世益覺厚顏務  
祈先生印加針砭附便擲還萬勿災諸梨棗徒  
滋貽笑方家

密字珍珠遠寄將簪花標格粉花香早欽道蘊名家女  
敢屈班昭弟子行四世交情存白髮千秋衣鉢有紅粧  
伏生自笑衰頹甚還想傳經到故鄉

洗馬圖

龍駒卷浪刷毛衣高坐支公興欲飛笑殺三郎豪氣少  
溫泉只解洗楊妃

正月二十六日陶怡雲移尊賞梅坐客董觀橋太  
史等七人以繞屋梅花三十樹爲韵得樹字

老人看花嬾舉步想喚梅花屋裡住折得橫斜千百枝  
高低上下親安布一瓶一几一燈張但見花開不見樹  
雪如闕白私窺簾月似相尋偶入戶夢醒未免師雄愁  
妻多定惹林逋如怕雲公子來宴客探花使者爭先赴  
董太史丁顧名思義盍探乎一笑花多手難措不如對  
未第三人奕子丁丁敲落仙雲將局護頭上時疑蝴蝶飛鼻間暗  
覺旃檀度三杯吞盡孤山春一室踏成銅井路記此盛

事如詩寫韻分箋七人賦梅花送客客不知衣上寒香帶歸去

平安南歌爲補山尚書作

有序

安南國王黎某爲臣阮惠所篡其國母率族衆  
逃至南寧求救杭州孫補山先生督兩廣奏請  
討之 詔命領兵前往大破之阮惠逃竄入其  
城立國王嗣孫黎淮而護送其逃人歸國一上  
嘉之賜爵謀勇公

堯之南交周越裳年年貢使日相望忽然國母款關至  
訴有篡臣亂紀綱乞賜 天朝師一旅遠爲與國扶屏  
王尚書拜疏臣請往一奏便聞 天子獎伐叛安邊

聖主心兵符玉節將軍掌朱鷺之山形崎嶇市球之江  
水毒淫一江才過一江深賊兵冒死爭抵敵螳蜋怒臂  
張如林尚書儒者色不動十萬貔貅左右擁錦帳談兵  
孔雀聽軍門傳箭蛟龍捧九天九地孫武謀八戰八克  
吳漢勇來嚼鐵李摩雲陣前奉命如嚴君浮橋誘黑夜  
燒出奇制勝誰能料指揮頃刻黎城定三軍出入無人  
境幾輒雖逃未授首呂嘉終獲難延命日南久不見王  
師壺漿箚食爭來迎尚書宣 詔立黎淮彼國君臣笑  
口開不肯縣陳貪尺土敢忘朝漢立高臺二百婁徒送  
出關佛桑花下唱刀環單于內附爭端息陲利來歸境  
土安屈指成功米陳月鬼方何用三年克紫桂濃熏甲

傳香蠻溪紅洗弓刀血蠻夷大長盡來賓威德傳呼到  
九真共欽遠國存宗社端賴中華有聖人提書飛報  
天顏喜重疊恩綸加不已一个詞臣得上公千秋佳  
話傳青史君不見吾鄉前朝三大賢文成忠肅劉青田  
雖然社稷功勲大尚未揚威海外天

兩湖制府畢秋祉先生六十壽詩

三湘開府樹旌旗四海傾心望衮衣五福壽從花甲始  
八州曾是狀元稀樓前仙笛吹黃鶴天上恩綸下紫  
微擬把卿雲比卿士一生長捧太陽飛

曾經三省任封疆水化恩波樹化桑巨細經綸陶太尉  
昇平歌舞郭汾陽蒼生引領覩丰采聖主加餐讀奏

章不是騷人領旌節肯將湯沐賜瀟湘

隻手能扶大雅輪英才強半出龍門百花都藉春風養  
五岳先推泰華尊但有青琴皆識曲斷無名士不懷恩  
金閨更喜詩人在海內文章與細論

謂游香夫人

多蒙裴令意相憐幾度書來喚樂天扶杖自應隨野叟  
稱觴或恐後羣仙夔龍屈指誰同輩黃綺看公尚少年  
知否秋江紅樹裏白頭人拜漢陽烟

### 二月八日記夢

夜夢老僧入門長揖賀余二十二日將還仙位  
問是何年月日曰本月也少頃又一道士如僧  
所云余生平不喜二氏之說而妖夢忽至驗固



佳不驗亦得

吸露餐霞四十年不成仙已久成仙如何尚有仙龜在  
夢裡分明與樂天

寄語仙人蔡少霞安排此老莫教差金銀宮闕非吾愛  
只愛天台二女家

二十三日荷塘遣人問安戲筆答謝

仙車盼斷夢無靈空惹親朋側耳聽慚愧戴逵根氣薄  
前生不是少微星

尚有人間未讀書匆匆何必賦歸歟多情恰感張元伯  
白馬朝來訊起居

開成衛宗同年爲臺灣舊事簿錄遣戍賦詩寄懷

東望愁雲結不開  
聞君消息我心哀  
魯人獵較當年事  
楚國亡猿此日災  
有妾那堪垂老別  
無兒莫上望鄉臺  
百身欲贖知能否  
從古神仙怕劫來

兒時同學長同年  
每到杭州訪必先  
滿院落花招舊雨  
一燈如雪聞吟箋  
黃楊厄閨憑空至  
白髮投荒舉世憐  
只望虞庭頒赦詔  
金鷄銜下九重天

浴湯山五絕句寄香亭兼謝荷塘明府

爲許聖水濯塵纓  
愛忍春寒遠出城  
剛是杏花村落好  
牧童相約過清明

方池有水是誰燒  
煖氣騰騰類湧潮  
五日熏蒸三日浴  
鬢霜一點不曾消

延祥寺裡証前因二十年前借住身今日僧亡菩薩  
應外我是再來人

對外閒行樂有餘阿連底事勸同車天生此水溫存性  
只恐妻孥轉不如

多謝張華地主情遣人洒掃遣人迎耳根洗得清如雪  
不聽人問事不平

洪武大石碑歌 離湯山十五里

青龍山前石一方弓尺量之十丈長兩頭未截空中央  
旁有員扇形更大直斬奇峯爲一坐欲負不負身尚卧  
相傳高皇開創氣槩雄欲移此碑陵寢中大書功德告  
祖宗壓倒唐漢驚羲農碑如長劍青天倚十萬駱駝拉

不起詔書切責下歐刀工匠虞衡井中死碑下有井芟刈羣  
雄笞八荒一拳頑石敢如此周顛仙人大笑來天威到  
此幾窮哉但赦青山留太僕勝扶赤子上春臺丁丁從  
此停開鑿夜深無復山靈哭牧豎宵眠五十牛村氓畫  
晒三千穀材大由來世莫收此碑千載空悠悠昭陵石  
馬無能戰漢代銅仙泪不流吁嗟乎君不見項王拔始  
皇鞭山石何嘗不可遷威風一過如輕烟惟有茅茨土  
階三五尺至今神功聖德高于天

自知

七十經過又四春自知非復舊精神客來平輩還相答  
詩怕頽唐越認真書畫不嫌千遍理亭臺重整一番新

譬如棋子將終局收拾全盤付後人

登湯山高處有感

登高忽有感慷慨作高歌日月閒時少乾坤空處多蒼  
松愁獨立流水愛奔波逝者如斯耳神仙與奈何

謝女弟子碧梧蘭友題隨園雅集圖

咏絮才原出謝家雙雙珠玉闌妍華披靄頃刻香風起  
開到西湖姊妹花

掃眉才子兩瓊枝自署門生遠致辭不怕程門三尺雪  
兒家情願立多時

惹得衰絲喜欲驚千秋佳話在門庭河汾講席公侯滿  
可有天邊織女星

孫晉山幽欄鳴琴圖

與君不相識開卷有琴聲  
花下七絃響溪邊一水鳴  
曲終松子落風定月華生  
我欲師襄訪移情海上行

蔡呂橋江樓喚鶴圖

一樓漢江水八面風窻開  
黃鶴久飛去青蓮今又來  
喚鶴鶴不應喚起江心月  
炤見謫仙人憑欄吹玉笛

佳句

佳句聽人口上歌有如絕色  
眼前過明知與我全無分  
不覺情深喚奈何

失去虛舟先生小楷書冊

虛舟小楷世無幾我得二千  
字如米銀鈞精寫靈飛經

眞珠密洒硃光紙紙尾自署兩年作平生精力盡于是  
持贈老友沈凡民此後牙琴彈亦已凡民珍護加跋詞  
至好如儼絕窺視亡何喬梓相繼亡我臨其喪爲料理  
媿孀感激泣相贈當作投瓊特報李拜而受之悲且喜  
頃刻兩賢都來矣頁頁掀翻嘆觀止方知一代作傳人  
苦心孤詣原如此金翅摩海龍攫天收束精神如芥子  
古來豪傑成奇功都從謹小慎微始錦褱香熏三十年  
一朝失去心難死萬索千搜去路遙料在人間非海底  
台畫能飛事豈眞銀杯羽化形相似想嫌我老物先行  
藏珍閣上悲風起

赴浴湯泉見路上翁仲感而有作

千尋華表石崔巍來往行人弔落暉  
六代如船搖擲去只留翁仲不能歸

贈揚州洪建侯秀才

天瑞五色雲人瑞鄭仁表從來天上石麒麟一落人間  
名最早洪郎二十貌清華生長膏腴舊世家家有園亭  
迎聖主門多冠蓋賞瓊花孩提便把平原繡服飾爭  
將臨汝夸誰知郎意蕭然遠一朶青蓮泥不染朝披書  
卷誦悄悄暮對幽人吟緩緩自采香芹一莞然肯將崔  
烈三公換與儂兩代締雷陳昨歲相逢臘底春聲聆雛  
鳳心先喜玉倚蒹葭意倍親特借僧厨欸摩詰代刊尺  
牘寵陳遵

某刻隨  
附尺牘

回思三十年前事琴歌酒賦分明記



桃花扇底月三更畫錦堂前人一世

已卯秋 今祖劉笏先生招看桃花

轉眼滄桑萬事空抽黃轉綠夢重重蘇夢有子與難

得張老雖衰頌未終相期手折今秋桂直上蓬山第一

峯

### 寄錢竹初

聞君竟賦遂初衣也逐閒雲野雀飛陶令一官真偶耳

鄭虔三絕本來稀知機不愧蕭嵩早勸退方知袁淑非

曾以苦招隱我似郗超慕高隱喜人歸勝自家歸

### 病中作

自憐生性像梧桐一到秋來便改容久不登樓看落葉

不知露出幾多峰

雄雞戛然鳴意欲催日出  
一鷄鳴不勝羣雞相輔翼  
一鳴兩鳴千萬鳴東方遼遼才露白  
老夫張眼望天明恨不催鷄早作聲

霞裳落第後有北行之志賦詩留之

聞君將欲赴長安  
惹我連宵意不懽  
萬里雲程求取好  
十年師弟別離難  
花無桃李春纔老  
座有瓊枝雪不寒  
趁此斜陽紅未了  
牙琴多作幾回彈

詩會分咏美人霞裳拈得綠珠連作五首不愜余  
意乃請老人擬賦兩章恐有鮑老登場之誚奈何  
一斛珍珠聘禮成  
美人心上尚嫌輕  
珍珠似妾原無價  
妾比珍珠恰有情

人生一死談何易看得分明勝丈夫聞說息姬歸楚日  
下樓還要侍兒扶

附陸崑圃作

金谷樓前玉質羅烏啼夜月有餘哀美人一點分明  
意不是珍珠買得來

作書託陳舒軒寄鎮遠將軍索裘舒軒慮路遠難  
到代將軍購得先寄賦詩謝之

一紙瑤華接好音輕裘遠寄水雲深思量野老禁寒態  
體貼將軍念舊心收到圍林剛下雪披來江上更題襟  
從今不受西風管添得燈窻半夜吟

青陽沈倫玉上舍與亦葦上人入山見訪贈詩志

別

屋內看君詩門外報君到文章真有神杜老早相告憶  
昔五煥遊逢君好風調相離八載餘蒼蒼改玉貌閒拉  
紫衣僧遠泛青溪棹各呈珠玉篇天機何清妙其時春  
正濃百花開窈窕有意若迎君嫣然齊欲笑惜我遽且  
衰不能陪登眺草草具盤飧時時看晚照此會非偶然  
此別中心悼大化有輪回前途寧可料只恐再相逢君  
老我翻少

庚戌春暮寓西湖孫氏寶石山莊臨行賦詩紀事  
再見西湖笑口開惹他魚鳥盡驚猜分明白髮滿頭叟  
說不來時今又來

借得孫莊勝畫圖行裝飛送入冰壺主人贈我千金值  
三面雲山一面湖

鼠姑階下剩殘紅楊柳當樓颺碧空一色琉璃鋪十里  
開門便作釣魚翁

從遊兩個女雲仙

雲鳳雲鶴

得信呼車拜榻前多謝朝朝送

清供湘蓴帶露筍含烟

一盃麥飯手親攜走奠先塋淚滿衣生怕歐公遷賴上  
龍岡阡畔紙錢稀

入城要訪舊知交床上人危塞上遙

興沙前輩危病臥床成山同年謫戍

寒外吹斷山陽一枝笛此身雖在已魂銷

兒時舊屋板橋西再訪前踪夢已迷剩有窓前丹桂樹

見儂嬉笑見儂啼

桃莊靈隱買舟探老去心愁再到難業已回身還轉步

一回分作兩回看

虛名何苦累袁絲酬應如麻力不支塞屋魚箋堆案絹  
差徭繁重是題詩

翻將地主作嘉賓當事紛紛置酒頻謂歸清兩觀察更

聽城門深夜報將軍傳箭放詩人將軍保公見訪湖上

紅妝也愛魯靈光問字爭來寶石莊壓倒三千桃李樹

星娥月姊在門牆女公子張乘葵徐裕馨汪婢等

彤彤暑到想歸家再說重遊話恐差且唱驅歌莫回首

一年春管一番花

題竹初菴圖贈樹驂主人

竹初先生今鄭虔獨擅三絕誰比肩偶然作宰東海邊  
魯之子賤漢任延庭前無訟堂有絃吏民交口稱其賢  
廣庭相公一見憐道當揮毫玉殿前如何簿領相拘牽  
大吏驚聞將擢遷先生搖首辭之堅士各有志公胡然  
官如大海中泊船何時傍岸心怕悞叔寶清羸生相偏  
僧祐善病兼愛閒奔馳風塵終寡便行當投劾歸弄田  
作書寄我將意宣回看父老留纏綿當斷不斷猶遲延  
我學繞朝贈以鞭勸馬卸轡箭離弦急流勇退全其天  
先生從諫如流泉欣攜劉寵一大錢高咏淵明歸去篇  
自買隙地起數椽白石齒齒池漣漣竹初帶露桃含烟

歸雲倦鳥相周旋不須鑿井時蹉跎自歌自畫自題箋  
考槃之樂將終焉客來治具饌飲鮮我口未近先流涎  
收藏書畫加丹鉛清秘閣中甲乙編蒙君相招兩夜眠  
漁郎入洞疑登仙請分坐席與君連循吏儒林止足間  
兩家各占三千年

姚思廉撰止足傳專爲晉仕者設所以別隱逸也

謝雨村居士饋墨

居士饋我墨十螺如導黑水來西河上鐫隨園先生著  
書墨意欲把墨將人磨其質精堅其色古和麝調烟三  
萬杵直追羣誕與庭珪豈止君房與于魯我愧無班馬  
挾天才攜之修史登蘭臺又無燕許如椽筆灑之黃麻  
作批敕徒然仰首看屋梁播弄風月爲詞章欲磨不磨



惹墨笑豹囊隱隱騰青光呼逢英雄人長鳴便吐氣麗  
歷世人只愁烏雲夜起風雨奇賞騎上空中自在行兩  
題奇方伯天馬行空圖胆寒一齊慙伏仰頭看是  
天馬西極來張眼不見地但氣飛漫漫我聞李衛公會  
川先生性倜儻一見驂騑卽滴水頃刻四海生春風又  
耳惟聞風雨響羣馴望之心阿母怕教成仙去特擣葱  
人是馬不可辨但見空中雲那用馳驅出邊塞不是鳴  
上青天騎白龍手灑葫蘆三畫出丹青若有神分明肝  
關李鄴侯幼時能向空中遊阿母怕教成仙去特擣葱  
蒜相遮留先生身際明良會那用馳驅出邊塞不是鳴  
鑾赴早朝便來江海搖旌旆畫出丹青若有神分明肝

胆向人真只憐逐電追風足難救拖泥帶水人

公方簿錄某中

家五

哭錢璵沙先生

有序

四月十六日余將還山行李已發念璵沙先生之病繞道作別不料五鼓已亡尙未殮也

才別西湖又別君入門僮僕換衣巾方知昨夜聞雞候已是先生駕鶴辰易簣餘聲猶在耳長眠喜氣尙迎人夷衾揭起重攜手未忍匆匆了宿因

平生風骨最闌珊獨有交情重似山一紙彈章驚海內

黃制府威震兩江時君特疏勅之

滿車甘雨在人間官高不改書生面

詩健能忘髣髴髮斑寄語九原隋武子他生趙孟再追攀

選詩

消夏閒無事將人詩卷看選詩如選色總覺動心難

山行

山行不厭草萋萋才上籃輿鳥便啼春雨濕衣簾未捲  
野花拂帽首頻低橋橫溪水都無板人去桑陰尚有梯  
掃罷先塋歸已晚斷鐘聲在夕陽西

雨中獨坐

從來無雨不成秋況復衰年坐小樓好夢醒難尋枕上  
落花扶不上枝頭司風令吏空相憶良醞中丞孰與謀  
雲影昏昏燈悄悄牕櫺行過一蜉蝣

喜補山宮保從西川移督兩江賦詩四首都寄

果然轉舵督江東人意天心往往同

公畫轉舵圖十六幅紀恩遇也故會

題云料得紀恩圖未了珠

江轉舵督江東今成詩識千里峨嵋來紫氣一朝南國

有春風爭聽野老呼生佛勝說詞臣爵上公

公初封不謀勇公

是孤忠能格主幾人恩眷極初終

客春海外奏鴈揚萬馬浮江劍有霜風掃鯨鯢真頃刻

氣吞蠻觸少周防偶然小挫同諸葛終竟餘威鎮鬼方

不信試看兩階舞是誰來享復來王

遭際如公古所難生平佳話滿朝端封疆解組登詞館

大將投戈作試官桃李三千新絳帳貔貅百萬舊軍壇

而今文武經綸畢又爲黃河勒馬看

公兼理河務

羊城猶記賦驪歌八載星霜兩鬢皤只道龍門渺河漢

何圖卿月照江波雲泥位分今生隔香火因緣宿世多  
願學龍邱蓑備錄爲公扶杖出烟蘿

前詩未寄而宮保書來問及新詩再答二首

行轅那得好工夫飛下龍蛇墨尙濡天與精神當八面  
公將文采照三吳五官並用無留牘雙管齊揮有智珠  
寄語蒼生應額手于今江左見夷吾

當年吉甫愛論文排日傳箋到夜分

尹文端公都中見懷云此日柴門風

雪裏有誰騎馬過詩來

一自裘衣還

北闕至今旗鼓失南軍欣

逢哲匠來持節多少風人想策勲可惜江淹才已盡不  
能簪筆圖淵雲

奇方伯少時冬日讀書圖

鄴侯仙骨本珊珊年少曾逢楊契丹寫出天人容絕代  
凌烟閣外我先看

玉軸牙籤滿碧櫺燈窗未免惜三餘知公兩件關心事  
世上蒼生架上書

七月廿六日大風園中古樹盡拔而小草晏然因  
之有作

大風拔樹不拔草駭浪驚人不驚鳥男兒入世才須長  
達者求懽志要小越人夸射能參天五步之內矢已顛  
廣廈萬間苦偪仄茅屋數椽足晏眠吾常讀書史吃吃  
笑不止公孫皇帝自尊嚴結局不如劉盆子

秋海棠

小朶嬌紅窈窕姿獨含秋氣發花遲暗中自有清香在  
不是幽人不得知

題我我圖

以指喻指理易得以水洗水水更潔達人了此善者機  
把鏡相看似相識鏡外之我未必真鏡中之我聊效顰  
世間除却青銅巧面口如君有幾人

奇方伯饋人葳形如小佛手

我讀柳邊紀畧書人葳白金價不殊騰貴于今未百載  
一葳葳抵一斛珠我嘗倚健誓不服見人服者心却掄  
不料行年垂八十忽嬰腹疾形神枯盧扁相環勸服藥  
非此難補中宮虛我非荆公性崛強敢將紫團力掃除

其奈將身與稜較我賤稜貴愧不如譬如巴蛇欲吞象  
心非不勇口怯怯奇公聞之大憐惜手持仙草佛手蘿  
脫手相贈勸卽噉慎勿愛惜猶躊躇開匣三稜全瑞麥  
交枝百結如珊瑚清香拂拂鼻觀覺仙露濛濛元氣俱  
我口未咽神已旺滿腔生意回須臾帶歸傳觀夸戚里  
嘖嘖偷視驚妻孥欲服不服但把玩旁人笑我愚公愚  
我道將軍恐負腹何況藜藿寒儒乎服之不效擲虛牝  
中人之產一嚼無服之有效後不繼博施堯舜猶病諸  
葛若珍藏當守器子孫寶護同璫璫只愧金環無處覓  
報恩空抱心區區願公推仁到黎庶春風吹扇周八衢  
活我活民兼活國萬家生佛非公歟



謝李太守贈葭

五馬人來丹桂天  
三種靈草賜尊前  
裴翁忽得長生藥  
太守原操造命權  
葛井丹砂分到手  
淮王雞犬合成仙  
只慚仲叔叨恩重  
豈止猪肝累俸錢

腹疾久而不愈作歌自輓邀好我者同作焉不拘  
體不限韻

人生如客耳有來必有去其來既無端其去亦無故但  
其臨去時各有一條路或以三年淹或以頃刻仆或明  
如水精或瘦如涸鮒黃帝雖成仙依然有陵墓扁鵲被  
刺死醫病不醫妬去路不雷同僕指難悉數我年垂八  
十神明頗強固客秋傷暑痢服藥偶然悞飽飲輒滯留

腸胃失常度每有前後漫相約必齊赴如船張破帆雖  
行不速渡如客騎病驢無鞭更緩步如酒滴漏卮前茹  
後已吐臨食不忘憂非僧強茹素雖然子公指染鼎心  
猶慕其奈廉將軍三遺矢可怖人身卽國家臟腑乃倉  
庫五倉逐漸空危亡在朝暮因之將平生歷歷自追溯  
弱冠登玉堂早獻凌雲賦飛鳧到江左民吏俱無惡山  
居四十年虛名海內布著書一尺高聚聚俱交付妻妾  
髣髴白兒童頭角露黃粱夢太長仙枕何時寤晨星雖  
竟天孤懸亦寡趣逝者如斯夫水流花不住但願著翅  
飛豈肯回頭顧偉哉造化爐洪鈞大鼓鑄我學不祥金  
躍冶自號呼作速海風迎仙龜陪白傅或遊天外天目

親所未覩勿再入輪廻依舊詩人作

諸公輓章不至口號四首催之

久住人間去已遲行期將近自家知老夫未肯空歸去  
處處敲門索輓詩

輓詩最好是生存讀罷猶能飲一樽莫學當年癡宋玉  
九天九地亂招魂

莫怪詩人萬念空一言我且問諸公韓蘇李杜從頭數  
誰是人間七十翁

臘盡春歸又見梅三才萬象總輪回人人有死何須諱  
都是當初死過來

附和作

趙翼

薤露如何可預支  
渡江來似別交知  
故人惟恐君真去  
不肯輕爲執紼詞

君果飄然去  
返真讓儂無佛易稱尊  
只愁老境誰同調  
獨立蒼茫也斷魂

生平花月最相關  
此去應將結習刪  
若見麻姑休背癢  
恐防又謫到人間

修短終須聽太空  
莫將殘錦乞諸公  
還防老學庵燈火  
絆住人間陸放翁

姚 鼐

龍飛四歲一詞臣  
嘯咏江山五十春  
莫怪尊前爲了語  
當時同輩久無人

一代文章作酒家爭求珠玉散天涯替人未得公須  
住天上寧無蔡少霞

宮闕前朝迹惘然隨園花竹獨清妍滄桑憑弔雖難  
免且願從遊更數年

起行拋杖坐吟詩豈是膏肓不可治自此但留貞疾  
在也堪談笑却熊羆

氣聚升成五色霓倏將散與太虛齊海山兜率猶粘  
著那更投生向玉溪

讀彭竹林司馬海洋獲盜詩喜而有作

海水搖天青不了萑苻草寇據爲島香山邑宰彭使君  
破浪乘風往前討賊奴心把儒者輕螳螂怒臂爭來迎

抽刀渡水直相犯風雲變色蛟龍驚誰知君計早預籌  
命舉砲火焚其舟青天霹靂如星流負嵎之虎一哭休  
紛紛藉藉水面投投昇河伯不肯收乾啼濕哭聲啾啾  
半沉半浮皆賊頭此時擒賊如把釣長繩魚貫無須鈎  
歸來獻俘軍門走節相褒嘉不離口人誇大盜獲三千  
君喜新詩添百首天子召見登明堂恩加冠帶榮  
非常古來循吏傳無偶海內騷人面有光紀君績爲君  
歌我老其如才薄何狄青應作平蠻頌劉秩真爲曳落  
河

九江觀察福公過訪見天女散花圖而乞之余雖  
贈猶憐賦詩送別適霞裳亦就渠書記之暇

有第三首

卅年紙上喚真真忽遇知音便嫁春天女臨行應一笑  
此翁翻作散花人

君是前身蔡少霞贈君仙女最宜家只愁霧鬢風鬟態  
羞見長安富貴花

觀察內寵六人

九江此日朔風嚴賴有長途樂事兼一个門生一天女  
被公奪去太傷廉

送霞裳之九江

十年前是相逢日十月十八日今唱驪歌亦此時似是安排  
天早定不須惆悵爲分離

翩翩書記駕香輶多少諸侯拜下風只有衰年張禹苦

彭宣一去後堂空

負笈全遊萬里來  
名山處處費詩才  
而今失却劉郎伴  
再到天台花不開

新共揚州看月明  
誰知轉眼賦西征  
殘棋再着知何日  
怕聽秋藤落子聲

少年直可賈生看  
我愧吳公作奏難  
不薦朝廷薦觀察  
爲君幾度廢書嘆

每到論詩兩茫然  
風人妙悟本通禪  
支公當日精神減  
總爲身邊喪法虔

夜半傳衣事已非  
臨岐握手尚依依  
生憎天上多情雪  
偏向程門立處飛



面丈原非日日親在家恰也手常分如何一說天涯別  
轉覺時時想着君

此去潯陽江上舟蘆花楓葉正當秋琵琶彈罷佳人去  
知否香山淚尚流

自笑

自笑多情范大夫西施網得獻東吳臨行兩下私房訂  
還要全舟泛五湖

蠹魚嘆

蠹魚蠹罷發長嘆如此琳瑯滿架攤富不愛看貧不暇  
世間惟有讀書難

錫山相公八十壽詩

小倉山房

卷三十二

美

天生潞國好精神坐鎮華夷有重臣八秩高年同聖  
主兩朝調鼎繼先人筵開賜第聽傳詔花發瓊林  
再看春二十七科黃閣老商盤夏鼎尚嫌新

當年慘綠少年郎曾受恩知話最長絳帳傳經雛鳳小

受之侍講

年才七歲泥金報捷館儻忙

救戊午館公家卽于是秋舉京兆

難追玉

局三春夢剩有南豐一瓣香倘共羣仙來晉爵袁絲也

算魯紫光